

Mr Mirza Bakšić, dipl.inž.*

AKTIVNOST SAVEZA GIGA IZMEĐU DRUGOG I TREĆEG SUSRETA

Prošle godine, ovdje na Igmanu je održana Skupština saveza GIG-a BiH kada su izabrana i radna tijela. Predsjedništvo je donijelo program svog rada koji se uglavnom, vjerujemo, uspješno i realizuje. Kao što se zna Savez GIG-a BiH djeluje preko svojih podružnica u Banja Luci, Mostaru, Sarajevu, Tuzli, Trebinju, čijih preko 1000 članova u 66, od 109 društveno političkih zajednica uspješno rade na omasovljavanju, održavanju radnih i stručnih sastanaka, održavanju sportskih takmičenja i drugarskih večeri.

Praksa je da podružnice svoje sastanke održavaju po opštinama, svaki put u sjedištu druge društveno političke zajednice. Ovakav način djelovanja posebno njeguje podružnica u Tuzli. Podružnica Banja Luka uspješno organizuje radne sastanke svake godine sa rukovodiocima organa uprave nadležnih za geodetske poslove, a podružnica Sarajevo jednom godišnje organizuje drugarsko veče.

Nažalost, geodeti iz 43 opštine nisu bili uključeni u rad Saveza. Zato je Predsjedništvo kao prioritetni zadatak postavilo organizaciono jačanje i omasovljavanje SGIG-a BiH. Nedavno je u Foči ponovno zaživio rad Drinsko-romanijske podružnice sa sjedištem u Goraždu za čijeg je predsjednika izabran drug Osman Pešto, veteran iz Rogatice, pa koristim ovu priliku da mu u ime svih vas čestitam. U Zenici su pred formiranjem podružnice, a vjerujemo da će to uskoro uraditi Doboju, Bihać i Livno.

Veoma mi je drago što mogu da vas obavijestim da je Podružnica Banja Luka 14.04. ove godine na dan Inženjera i tehničara za svoj uspješan rad dobila priznanje Povelju SIT-a Bosne i Hercegovine. Savez GIG-a BiH kandidovao se i dobio kandidaturu za održavanje savjetovanja sa temom "Održavanje premjera i evidencije o nekretninama", koje će se održati 26. i 27.10. u hotelu "Terme" na Ilidži.

Savez GIG-a Jugoslavije do ovog savjetovanja treba da izda Monografiju o geodetskoj djelatnosti u našoj zemlji za period 1973-1990. godine. Savez GIG-a BiH za ovu Monografiju je već pripremio materijal o geodetskoj djelatnosti u našoj republici.

* Geodetski zavod Bosne i Hercegovine, Sarajevo

Savez GIG-a BiH izdaje svoju publikaciju "Geodetski glasnik". Cijeneći da iznalaženje ove publikacije ima puno opravdanje, Predsjedništvo je formiralo novi Izdavački savjet i Redakcioni odbor. U ovoj godini izašao je 27 broj "Geodetski glasnik", a dat je prijedlog da se pisani materijal i sa današnje i sutrašnje rasprave o Izmjenama i dopunama Zakona o premjeru i katastru nekretnina štampa kao slijedeći broj "Geodetskog glasnika". Kao što znate, svu brigu oko izdavanja ove publikacije veoma uspješno vodi Geodetski odsjek na Građevinskom fakultetu, na volonterskoj osnovi, pa im ovom prilikom odajemo puno priznanje.

U proteklom periodu Predsjedništvo je, sprovodeći zaključke sa II susreta, formiralo Komisiju za pitanje "djelatnosti ličnim radom i sredstvima u svojini građana" sa zadatkom da se što prije otvori mogućnost i ove djelatnosti, o čemu će i na ovom skupu biti riječi.

Predsjedništvo je podržalo inicijativu da se hiperprodukcija geodetskog kadra u središnjim školama zaustavi te da se zadrži školovanje samo na Geodetskoj školi u Sarajevu. Također je vodilo inicijativu o mogućnosti školovanja uz rad na I stepenu fakulteta. Nažalost, kako sada stvari stoje u našoj republici takva mogućnost ne postoji.

Inicijativi da se prof.dr Muminagić Abdulah kandiduje za člana Akademije nauka BiH Predsjedništvo je sa zadovoljstvom dalo svoju saglasnost.

Djelujući u Predsjedništvu Saveza GIG-a Jugoslavije delegati iz naše republike dali su svoj doprinos na njegovoj aktivnosti, a između ostalog i u organizaciji savjetovanja na Kopaoniku i u Bečićima, donošenju Zakona o osnovama geodetske djelatnosti od interesa za cijelu zemlju, izmjeni i dopuni Samoupravnog sporazuma o udruživanju i Statutu SGIG-a Jugoslavije, međunarodnoj saradnji itd.

U saradnji sa Republičkom upravom za geodetske i imovinsko-pravne poslove utvrđena je tema za stručnu raspravu na III susretima. Zakon o premjeru i katastru nekretnina živi već 6 godina i sigurno je da je praksa pokazala da ovaj zakon treba pretrpiti određene izmjene.

Programom rada Izvršnog vijeća i Skupštine SR Bosne i Hercegovine za 1990. godinu predviđeno je donošenje Zakona o izmjenama i dopunama Zakona o premjeru i katastru nekretnina. Prednacrt Zakona treba dostaviti Izvršnom vijeću u septembru da bi do konca godine bio i usvojen.

Poslijeratna geodetska djelatnost se nije nalazila u težoj situaciji nego što je ova, prije svega što nije nađeno pravo rješenje za finansiranje geodetske djelatnosti. Zato je ovo prava prilika da iznesemo svoja gledišta i prijedloge koji će, ako uđu u zaključke, biti upućeni putem Republičke uprave za geodetske i imovinsko pravne poslove Izvršnom vijeću.

Kao što ste već vidjeli izloženi su instrumenti i računari "Mladost" Zagreb, ERC Energoinvest, UNIS UNI DATA, a Geodetski zavod u Sarajevu prezentira svoje

programe i mogućnosti. Također se putem njihovog računara možete informisati o svim tekućim novostima sa III susreta.

U sportskom dijelu učestvuje 450 takmičara. Žao nam je što nismo pripremili i takmičenje u stručnoj disciplini, neki manji stručni zadatak, no treba se potruditi da na narednim susretima i ta disciplina uđe u program.

Ovdje moram da konstatujem da sportska takmičenja neće imati istu draž kao i ranijih godina, jer nažalost ne učestvuju sportisti Geodetskog zavoda, koji zbog poznatih razloga nisu mogli da se uključe u ovu manifestaciju.

Zaželimo im da što prije prebrode sadašnju situaciju, te da na IV susretima dođu u punom sastavu.

Organizator i domaćin su dali sve od sebe da primjedbi na organizaciju bude što manje. Ono što nije u moći organizatora, a što je njegova velika želja je da nas posluži lijepo vrijeme.

Na kraju bih želio da vam preporučim neke sadržaje hotela.

Prije svega, muzejsku izložbu posvećenu Igmanskom maršu.

Želio bih da vas sa par riječi podsjetim na ovaj herojski podvig boraca NOB-e.

Trodnevni marš oko 730 boraca Prve proleterske brigade počeo je 25. januara 1942. godine iz sela Gajeve kod Olova i kretao se preko planine Ozren, kroz Sarajevsko polje do Vrela Bosne te preko planine Igman do sela Presjenice kod Trnova, odnosno dalje do Foče. Zbog velike hladnoće (temperatura na Igmanu bila je -32°C). U maršu je promrzlo 158 boraca, od toga 41 teško, 109 lakše i 8 slučajeva sa promrzlinama bez gubitka prstiju. Promrzli su sa Velikog Polja do Presjenice prebačeni istog ili slijedećeg dana, na saonicama koje su vukli ljudi, i na konjima preko Trnova i Dobrog Polja do Miljevine, a dalje do Foče šumskom željeznicom.

Muzejska izložba se nalazi u suterenu i bit će danas otvorena od 15-17 sati. Na I spratu imate prodajnu galeriju, u prizemlju bazen i saunu, suvenirnic fri šop, modni butik, kasino, frizeraj itd. Ako neko želi da poveća kondiciju ili skine koji gram može dobiti bicikl, a na Velikom polju ima asfaltiranih skijaških staza preko 20 kilometara.

A sada dozvolite mi da predložim Predsjedništvu za ovu, svečanu sjednicu drugove: Pešto Osmana, Predsjednika drinsko-romanijske podružnice Gorazde; Knežević Luku, Predsjednika podružnice Sarajevo; Arnautović Kemala, Predsjednika podružnice Banja Luka; Camić Izeta, Predsjednika podružnice Tuzla; Sadović Ismeta, Predsjednika podružnice Trebinje; Kuzmanović Ljubišu, Predsjednika podružnice Mostar i sebe.